

Ustria dil vitg cun puncts da Gault Millau

El Hotel Postigliun ad Andiastr ei jester ed indigen beinvegniu

DA GIUSEP VENZIN / ANR

■ Per l'emprega figurescha il Hotel Postigliun da Guido e Corina Sgier d'Andiastr el guid da Gault Millau, el pli impurtont guid d'ustrias dalla bucca fina. Quella honur han ils ustiers dil hotel all'entrada dil vitg meritau cun qualitad e cun constanza e Guido Sgier punctuescha: «Ils 13 puncts da Gault Millau havein nus contonschiu ensemen.» Ferton che Guido Sgier regia en cuschina ei sia dunna Corina responsabla pil servis e pigl ambient. «Il hosp vul magliar bein, mo el vul era sesentir bein», han ils ustiers remunerai detg a caschun d'ina viseta ad Andiastr. Quei havevan Corina e Guido Sgier gia detg avon diesch onns cura che la cuschina era vegnida reconuschida culla capetscha dalla Cumpignia da cuschiniers. «Il hosp maglia era culs eglis. Ina spisa extraordinaria duei vegnir magliada en in ambient extraordinari.» Avon ina jamna ha il Hotel Postigliun retschert ina secunda buna nova. El ei taxaus sco hotel da treis steilas.

Cun agid dils hospes

Per Guido e Corina Sgier ei il hosp en scadin cass il retg e quei retg reconuscha era las prestaziuns dils ustiers d'Andiastr. Ils hospes han mess ils examinaders da Gault Millau sils fastitgs dalla cuschina el vitg cun 200 habitonts ed ils hospes han era intimau ils ustiers allas prestaziuns extraordinarias. «Il laud dalla clientella ha adina motivau nus.» Cura ch'il giuven



Guido Sgier (seniester) ha era in bien maun culs emprendists. Tamara Demont da Trun frequenta il tierz onn d'emprendissadi.

FOTO G. VENZIN

pèr ha surpriu igl onn 1989 il Hotel Postigliun el vitg nativ eran las finamiras aunc buca schi concretas. Guido Sgier

haveva fatg igl emprendissadi a Val ed empriu d'enconuscher leu e suenter el Tessin ed a Geneva ils giavischs dalla

clientella internaziunala. Ad Andiastr ei la clientella meins internaziunala, mo il giavisch da magliar bein ei il medem. Il

meins october han ils hospes saviu guder ina dallas specialitads dalla cuschina tradiziunala, la carn selvadi. Guido Sgier ei sez catschadur e sias creaziuns ein enconuschatas sur ils cunfins. El numna sia cuschina tradiziunala, denton creativa. Quella creativad ei tschercada. L'ustria cun bunamein 40 plazz ei savens occupada. «La reclama bucca tier bucca ei la megliera ed aunc la pli favoreivla», constatescha igl ustier da Gault Millau.

Buna mischeida

Breil ed Andiastr dumbran treis ustrias distinguidas cun puncts da Gault Millau. Per Guido Sgier ei quei denton buc en emprega lingia concorrenza, mobein motivaziun e pil liug turistic d'avantag. «Las treis ustrias fuorman ina buna mischeida ed attiran ils hospes.» La stad vi-setan bia hospes da Breil l'ustria ad Andiastr e hospes d'Andiastr las ustrias a Breil. Igl unviern ei la colligiaziun meins favoreivla. Guido Sgier giavischa ina megliera colligiaziun che daventass realitad tier ina fusiun dallas vischnancas Breil, Vuorz ed Andiastr.

Avon diesch onns haveva il cuschinier dalla bucca fina engaschau in emprega emprendist e detg: «Sco quel emprega da mei, vi jeu era emprega dad el.» En scadin cass han ils emprendists la caschun d'emprega bia da Guido Sgier. Dacuort ha Livio Vincenz terminau igl emprendissadi da cuschinier el Hotel Postigliun. Quei ha il giuven d'Andiastr fatg cul meglior examen svizzer.

Munconza da logopedes e terapeuts romontschs

Ord il rapport da gestiun 2010 dalla Regiun Surselva (8)

■ (mc) Da niev ei era il survetsch logopedic che vegn dirigiu da Lucia Lechmann Carigiet integras el Center da formaziun Surselva. Damai ch'ei dat memia paucs logopedes resp. terapeuts che discuoan romontsch ha il survetsch da logopedia da sbatter cun ina sutcapacitad permanenta da plazz da terapia. Igl onn 2010 han las 9 logopedas e logopedes engaschai en rodund 3,5 plazzas cumpleinas dau 3031 lecziuns da terapia per affons, fatg 204 examinaziuns e menau 363 dis-

cuors cun geniturs. Ferton che la sedia dalla logoterapia sesanfla a Glion dat ei staziuns externas a Mustér, Flem, Lumbrin, Rueun, Sedrun, Trun, Versomi, Vella e Vuorz. Loghens da scola subregional cun scolaziun speciala integrada dat ei a Castisch, Danis, Ruschein, Sagogn e Val S. Pieder. Plinavon han ils logopedes dau 122 lecziuns da terapia per carschi.

Ina liunga gliesta da spetga

Sil sector dalla terapia da scola ein 17

persunas engaschadas en in pensum total da rodund 3,28 plazzas. Dallah total 3617 lecziuns da terapia da scola serefereschan 2650 alla legastenia e 967 alla discalculia. La munconza da logopedes e terapeuts romontschs caschuna ina liunga gliesta da spetga, aschia che buca tut ils affons sappien vegnir susteni a moda optimala, constatescha Lucia Lechmann. Ina mesira cumprovada per surmuntar quella situaziun d'urgenza seigi da porscher fasas da terapia pli cuortas e terapia

en gruppas pintgas per affons cun disturbis semegliants.

Mutaziuns personalas

Cun la fin digl onn da scola 2009/2010 ei il logoped Linus Collenberg ius en pensiu suenter ina activitad da plirs onns sco logoped e president dalla cumissiun da logopedia. L'elecziun dil logoped Luis Coray ha possibilitau d'occupar da niev il post da terapia a Mustér. Silvia Parli da Trin, pedagoga curativa da scola, termina sia activitad sco terapeuta ella regiun Surselva e s'orientescha professunalmeins da niev ordeifer la regiun. Sco nova pedagoga curativa da scola diplomada ei Zita Maissen-Tuor vegnida engaschada cun liug da lavur a Trun. Treis terapeuts han finiu la stad 2010 il studi complementar alla professiu alla Scola aulta per pedagogia curativa a Turitg/Cuera acquistond il diplom da pedagogas curativas. Tuttas terapeutas e tuts terapeuts han plinavon frequentau il cuors rumantsch grischun en scola, organisai dil cantun.

Tgei cumpeglia la logopedia?

La logopedia ei ina mesira pedagogic-terapeutica, resp. medicinal-terapeutica e cumpeglia ton il plaid, il spert e l'educaziun. Damai che la scolaziun elementara, la socialisaziun e la formaziun professunal pretendan in'aulta cumpetenza linguistica eis ei impurtont che las difficultads da lungatg e dalla dicziun vegnien recuperadas ton sco pusseivel cun instradar ad uras ina terapia corrispudenta.

Il survetsch logopedic porscha ils suandonts survetschs: prevenziun, sclariment, diagnostica, cussegliaziun e terapia. La logopedia sa gidar tier disturbis digl acquist da lungatg, tier disturbis da discuoer, tier disturbis dalla motorica dalla bucca e dil laguoter, disturbis da tschintschar flessiont, disturbis da comunicaziun, disturbis dalla vusch e dil tun dalla vusch, disturbis da leger e scri-

ver, disturbis da tschintschar, trer flad e laguoter sco era difficultads da quintar e far quen.

Midadas sco suletta constanta

Ella politica cantunala da formaziun paran las midadas d'esser la suletta constanta, scriva Lucia Lechmann. Damondas d'integraziun, il dossier Mesiras specialas da scolaziun, il dossier da qualitad, la collaboraziun interdisciplinara e la lavur administrativa absorben adina dapli temps e bia energia. Ei seigi mo da sperar che las midadas cuntinuardas ella politica da scola portien novas perspectivas pil profil professunal dallas logopedas e dils logopedes senza trer pil tempel en tut quei che ei secumprovau. Las adattaziuns duein succeder mo leu nua ch'ellas ein opportunas per segirar la qualitad. Cun gronda tensiu spetgjen logopedas e logopedes per quei sin la nova lescha da scola, scriva Lucia Lechmann concludend.

■ ARTG PERSONAL

Gratulaziun a Sagogn: Oz, ils 26 d'october festivescha nies anteriur selvicultur, Toni Cavelti-Blumenthal, siu 80avel anniversari. Sper sia lavur e quitau per nos uauls ei «Toni förster» s'engaschau duront decennis pil maun public. Aschia eis el staus biars onns el cussegel d'administraziun dalla Banca Raiffeisen ed ha era giu bien quitau digl archiv communal. Era la plev ed il chor viril han profitau duront biars onns da siu sustegn. Il giubilar vala dil reminent sco in dils megliers enconuschiders digl Uaul Grond. Tochen tier sia pensiu igl onn 1996 eis el staus responsabels duront decennis per ina buna part da quei intschess ch'ei sin territori da Sagogn. Nus gratulein cordialmeins a nies convischin giavischond ad el vinavon tut il bien en buna sanadad.



Per ch'ils tractaments da logopedia hagien success eis ei impurtont d'entscheiver aschi baul sco pusseivel culla terapia.

MAD